



SLUŽBENI GLASNIK REPUBLIKE SRPSKE

Jezik
bošnjačkog naroda

JU Službeni glasnik Republike Srpske,
Banja Luka, Veljka Mladenovića bb
Telefon/faks: (051) 456-331, 456-341
E-mail: slglasnikrs@blic.net
sgl.finanse@blic.net
sgl.oglasni@blic.net

Utorak, 25. decembar 2012. godine
BANJA LUKA

Broj 121 God. XXI.
www.slglasnik.org

Žiro-računi: Nova banka a.d. Banja Luka
555-007-00001332-44
NLB Razvojna banka a.d.
Banja Luka 562-099-00004292-34
Volksbank a.d. Banja Luka
567-162-1000010-81
UniCredit Bank a.d. Banja Luka
551-001-00029639-61
Komercijalna banka a.d. Banja Luka
571-010-00001043-39
Hypo-Alpe-Adria Bank a.d. Banja Luka
552-030-00026976-18

2571

Na osnovu Amandmana XL. tačka 2. na Ustav Republike Srpske ("Službeni glasnik Republike Srpske", broj 28/94), donosim

UKAZ

O PROGLAŠENJU ZAKONA O BUDŽETSKOM SISTEMU REPUBLIKE SRPSKE

Proglašavam Zakon o budžetskom sistemu Republike Srpske, koji je Narodna skupština Republike Srpske usvojila na Dvadeset trećoj sjednici, održanoj 13. decembra 2012. godine, a Vijeće naroda 24. decembra 2012. godine konstatiralo da usvojenim Zakonom o budžetskom sistemu Republike Srpske nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-4104/12
25. decembra 2012. godine
Banja Luka

Predsjednik
Republike,
Milorad Dodik, s.r.

ZAKON

O BUDŽETSKOM SISTEMU REPUBLIKE SRPSKE

I. OSNOVNE ODREDBE

Član 1.

Ovim zakonom uređuju se budžetski sistem Republike Srpske (u daljem tekstu: Republika), priprema, planiranje, način izrade, donošenje i izvršenje budžeta Republike Srpske (u daljem tekstu: budžet Republike), budžeta općina, gradova i fondova, zaduživanje i otplata duga, računovodstvo, izvještavanje i kontrola budžeta Republike, općina, gradova i fondova.

Član 2.

Pojmovi upotrijebljeni u ovom zakonu imaju sljedeće značenje:

a) budžet je procjena budžetskih sredstava i budžetskih izdataka za jednu fiskalnu godinu,

b) fiskalna godina obuhvaća period od 12 mjeseci, koji počinje 1. januara, a završava se 31. decembra kalendarske godine,

v) budžetski korisnici su organi, organizacije i drugi subjekti javnog sektora (osim javnih preduzeća) koji se fi-

nansiraju iz budžeta Republike, općina, gradova i fondova i koji su pod njihovom kontrolom u skladu sa zakonom,

g) fondovi u smislu ovog zakona su: Fond za penzijsko i invalidsko osiguranje Republike Srpske, Fond zdravstvenog osiguranja Republike Srpske, Javni fond za dječiju zaštitu Republike Srpske i Zavod za zapošljavanje Republike Srpske,

d) račun javnih prihoda je račun na koji se vrše uplate javnih prihoda Republike, općina, gradova i fondova i sa koga se vrši raspodjela na račune korisnika javnih prihoda,

đ) Jedinstveni račun trezora je račun na koji se vrše uplate sredstava na ime Republike, općina, gradova i fondova sa računa javnih prihoda ili direktno, kao i sve isplate u ime Republike, općina, gradova i fondova, a sistem Jedinstvenog računa trezora sastoji se od računa javnih prihoda, investicionih računa, transakcionih računa, te računa za posebne namjene,

e) račun posebnih namjena je račun koji na zahtjev budžetskog korisnika otvaraju trezor Republike i trezori općina, gradova i fondova na koji se vrše uplate sredstava posebnih namjena, kao i sve isplate po namjenama ili projektima,

ž) jedinstveni račun za indirektno poreze koji vodi Uprava za indirektno oporezivanje BiH (u daljem tekstu: Jedinstveni račun UIO) je račun na koji se uplaćuju indirektni porezi i

z) javne investicije predstavljaju dio planiranih sredstava budžeta Republike koji se ne raspoređuje unaprijed, već na osnovu posebnih odluka Vlade Republike Srpske (u daljem tekstu: Vlada), a podrazumijevaju ulaganja u značajno povećanje vrijednosti nefinansijske imovine kroz sticanje infrastrukture općeg značaja, lokalne infrastrukture, građevinskih objekata, zemljišta i opreme.

II. BUDŽETSKI SISTEM REPUBLIKE SRPSKE

Član 3.

Budžetski sistem Republike čine budžet Republike, budžeti općina i gradova i budžeti - finansijski planovi fondova (u daljem tekstu: budžeti fondova).

Član 4.

U skladu sa ovim zakonom, jedinstvenost budžetskog sistema Republike osigurava se zajedničkim pravnim uređenjem, jedinstvenom budžetskom klasifikacijom, upotrebom jedinstvene budžetske dokumentacije za izradu budžeta Republike, općina, gradova i fondova, jedinstvenim siste-

mom budžetskog računovodstva, jedinstvenim kriterijima za budžetsku kontrolu i jedinstvenim principima na kojima se zasniva budžetski postupak.

Član 5.

(1) Budžetska sredstva u jednoj fiskalnoj godini čine budžetski prihodi i primici za nefinansijsku imovinu, primici od finansijske imovine i zaduživanja tekuće fiskalne godine, neutrošena namjenska sredstva budžetskih grantova i transfera iz ranijih perioda i suficit raspoređen odlukom nadležnog organa.

(2) Budžetska sredstva se koriste za finansiranje funkcija budžetskih korisnika, za izvršavanje njihovih zadataka i ostale namjene koje su u skladu sa Ustavom i zakonom, kao i propisima organa jedinica lokalne samouprave i fondova.

(3) Budžetske prihode čine javni prihodi, tekući i kapitalni grantovi iz zemlje i inozemstva i transferi primljeni od drugih budžetskih jedinica.

(4) Javni prihodi su prihodi utvrđeni u skladu sa zakonom i ostvareni po osnovu poreza, pristojbi, doprinosa, naknada i drugih prihoda kojima se finansiraju prava i dužnosti Republike, općina, gradova i fondova.

(5) Budžetski grantovi su bespovratna finansijska sredstva dobivena od domaćih ili stranih fizičkih i pravnih lica, koja su uključena u prihode budžeta.

(6) Finansiranje predstavlja način pokrića planiranog ili ostvarenog budžetskog deficita, odnosno način raspodjele planiranog ili ostvarenog budžetskog suficita.

(7) Neto finansiranje predstavlja razliku između primitaka od finansijske imovine i zaduživanja i izdataka za finansijsku imovinu i otplatu dugova.

Član 6.

(1) Planirana budžetska sredstva i planirani budžetski izdaci moraju biti uravnoteženi.

(2) Budžetske izdatke čine budžetski rashodi, izdaci za nefinansijsku imovinu i izdaci za finansijsku imovinu i otplatu dugova.

(3) Budžetske rashode čine rashodi za osobna primanja, rashodi po osnovu korištenja robe i usluga, rashodi finansiranja i drugi finansijski rashodi, subvencije, grantovi, doznake na ime socijalne zaštite i transferi drugim budžetskim korisnicima.

(4) Pojam budžetskih prihoda i budžetskih rashoda nije ekvivalentan pojmu prihoda i rashoda koji je definiran u Međunarodnim računovodstvenim standardima za javni sektor i koji je relevantan za izradu finansijskog izvještaja na određenom nivou vlasti u Republici.

Član 7.

(1) Budžetska sredstva koja pripadaju budžetu Republike i koja se dijele između budžeta Republike i budžeta općina i gradova uplaćuju se sa računa javnih prihoda.

(2) Budžetska sredstva koja u cijelosti pripadaju budžetu općine ili grada, a koja predstavljaju njihove izvorne prihode, uplaćuju se sa računa javnih prihoda općine, odnosno grada.

Član 8.

Prihodi budžeta Republike su:

a) dio prihoda od indirektnih poreza uplaćen u budžet Republike sa Jedinstvenog računa UIO, utvrđen u skladu sa principima raspodjele definiranim ovim zakonom, koji nakon raspodjele sa drugim korisnicima u Republici pripadaju budžetu Republike;

b) porez na dobit;

v) porez na dohodak:

1) porez na dohotke od autorskih prava, prava srodnih autorskim pravima i prava industrijske svojine,

2) porez na prihode od kapitala,

3) porez na prihode od kapitalnih dobitaka;

g) porezi na upotrebu, držanje i nošenje dobara:

1) porez na upotrebu motornih vozila,

2) porez na upotrebu čamaca, plovećih postrojenja i jah-

ti,

3) porez na upotrebu zrakoplova i letjelica,

4) porez na držanje i nošenje oružja;

d) pristojbe:

1) republičke administrativne pristojbe,

2) republičke sudske pristojbe,

3) posebna republička pristojba;

đ) naknade:

1) koncesione naknade za korištenje prirodnih i drugih dobara od općeg interesa, izuzev koncesionih naknada za korištenje mineralnih sirovina,

2) naknade, odnosno sredstva za zaštitu okoline,

3) naknade za korištenje prirodnih i drugih dobara od općeg interesa,

4) naknade za priređivanje igara na sreću;

e) novčane kazne, izuzev kazni utvrđenih aktima grada, odnosno općine;

ž) prihodi od nezakonito stečene imovine i imovinske koristi;

z) prihodi od grantova;

i) prihodi koje budžetski korisnici ostvare vršenjem redovne i dopunske djelatnosti u skladu sa zakonom, u procentu utvrđenom zakonom kojim se uređuje izvršenje budžeta i

j) ostali prihodi budžeta Republike.

Član 9.

Prihodi koji se dijele između budžeta Republike, budžeta općina i gradova i drugih korisnika su:

a) prihodi od indirektnih poreza, uplaćeni u budžet Republike sa Jedinstvenog računa UIO, koji se nakon izdvajanja dijela sredstava za servisiranje vanjskoga duga Republike dijele na sljedeći način:

1) budžet Republike 72%,

2) budžeti općina i gradova 24%,

3) JP "Putevi Republike Srpske" 4%;

b) prihodi od poreza na dohodak:

1) porez na prihode od samostalne djelatnosti, koji se dijeli između budžeta Republike i budžeta općina i gradova u srazmjeri 75 : 25,

2) porez na osobna primanja, koji se dijeli između budžeta Republike i budžeta općina i gradova u srazmjeri 75 : 25;

v) prihodi od naknada za promjenu namjene poljoprivrednog zemljišta, koji se dijele između budžeta Republike i budžeta općina i gradova u srazmjeri 30 : 70;

g) prihodi od zakupnine zemljišta u svojini Republike, koji se dijele između budžeta Republike i budžeta općina i gradova u srazmjeri 50 : 50;

d) prihodi od koncesionih naknada za korištenje mineralnih sirovina, koji se dijele između budžeta Republike i budžeta općina i gradova u srazmjeri 30 : 70;

đ) prihodi od posebnih vodnih naknada:

1) naknade za zahvatanje površinskih i podzemnih voda, koje se dijele između budžeta Republike i budžeta općina i gradova u srazmjeri 70 : 30,

2) naknade za proizvodnju električne energije dobivene korištenjem hidroenergije, koje se dijele između budžeta Republike i budžeta općina i gradova u srazmjeri 70 : 30.

3) naknade za vađenje materijala iz vodotoka, koje se dijele između budžeta Republike i budžeta općina i gradova u srazmjeri 70 : 30,

4) naknade za zaštitu voda, koje se dijele između budžeta Republike, budžeta općina i gradova i Fonda za zaštitu životne sredine Republike Srpske u srazmjeri 55 : 30 : 15 i

e) oduzeta imovinska korist i sredstva dobivena od prodaje oduzetih predmeta iz nadležnosti Republičke uprave za inspeksijske poslove, koja se dijeli između budžeta Republike i budžeta općina i gradova u srazmjeri 70 : 30.

Član 10.

(1) Pojedinačno učešće općina i gradova u raspodjeli prihoda iz člana 9. tačka a) ovog zakona vrši se u skladu sa sljedećim kriterijima:

- a) 75% na osnovu broja stanovnika općine i grada,
- b) 15% na osnovu površine općine i grada i
- v) 10% na osnovu broja učenika u srednjim školama.

(2) Sredstva doznačena općinama i gradovima smatraju se općim transferom, tako da ih općine i gradovi koriste u skladu sa svojim budžetom.

(3) Sistem raspodjele između općina i gradova iz člana 9. tačka a) ovog zakona provodi se do 2016. godine, prema formuli:

1. godina: $X(i) = a(i) \cdot 0,85 + b(i) \cdot 0,15$
2. godina: $X(i) = a(i) \cdot 0,80 + b(i) \cdot 0,20$
3. godina: $X(i) = a(i) \cdot 0,70 + b(i) \cdot 0,30$
4. godina: $X(i) = a(i) \cdot 0,60 + b(i) \cdot 0,40$
5. godina: $X(i) = a(i) \cdot 0,50 + b(i) \cdot 0,50$
6. godina: $X(i) = a(i) \cdot 0,40 + b(i) \cdot 0,60$
7. godina: $X(i) = a(i) \cdot 0,30 + b(i) \cdot 0,70$
8. godina: $X(i) = a(i) \cdot 0,20 + b(i) \cdot 0,80$
9. godina: $X(i) = a(i) \cdot 0,10 + b(i) \cdot 0,90$
10. godina: $X(i) = b(i) \cdot 1$

pri čemu je:

$X(i)$ - udio koji općina i grad imaju u iznosu sredstava određenom za općine i gradove u skladu sa članom 9. tačka a) ovog zakona,

a (i) - istorijski udio koji je određena općina i grad imala u prihodima od poreza na promet i akcizama u 2005. godini,

b (i) - udio koji određena općina i grad imaju u iznosu sredstava određenom za općine i gradove nakon primjene kriterija iz stava 1. ovog člana.

(4) Koeficijenti raspodjele u skladu sa formulom iz stava 3. ovog člana utvrđuju se odlukom Vlade.

Član 11.

Prihodi budžeta općina i gradova su:

- a) porez na imovinu, odnosno nepokretnosti;
- b) novčane kazne izrečene u prekršajnim postupcima za prekršaje utvrđene aktima gradova, odnosno općina;
- v) općinske administrativne pristojbe;
- g) komunalne pristojbe;
- d) posebne vodne naknade - naknade za zaštitu od voda;
- d) općinske naknade za korištenje prirodnih i drugih dobara od općeg interesa;
- e) porez na dobitke od igara na sreću;
- ž) boravišne pristojbe;
- z) ostali prihodi, kao što su:

1) prihodi od grantova, transfera i prihodi koje budžetski korisnici ostvare obavljanjem redovne i dopunske djelatnosti u skladu sa zakonom, u procentu koji je utvrđen odlukom o izvršenju budžeta i

2) ostali općinski prihodi.

Član 12.

Prihodi budžeta fondova su:

- a) doprinosi,
- b) transferi iz budžeta,
- v) grantovi i
- g) ostali prihodi.

Član 13.

Uvođenje novih, ukidanje postojećih i izmjena kriterija za raspodjelu prihoda budžeta Republike, općina, gradova i fondova iz čl. 8, 9, 11. i 12. može se vršiti samo u skladu sa zakonom.

Član 14.

(1) Budžetski okvir predstavlja iznos budžetskih izdataka u jednoj fiskalnoj godini planiranih u svrhu finansiranja budžetskih rashoda i izdataka za nefinansijsku imovinu, uvećan za iznos negativnog neto finansiranja.

(2) Budžetski suficit predstavlja pozitivnu razliku između zbira budžetskih prihoda i primitaka za nefinansijsku imovinu i zbira budžetskih rashoda i izdataka za nefinansijsku imovinu.

(3) Budžetski deficit predstavlja negativnu razliku između zbira budžetskih prihoda i primitaka za nefinansijsku imovinu i zbira budžetskih rashoda i izdataka za nefinansijsku imovinu.

(4) Godišnjim budžetom određuje se način korištenja planiranog budžetskog suficita, odnosno način finansiranja planiranog budžetskog deficita.

(5) Nije dozvoljeno predlaganje budžeta koji sadrži planirani nepokriveni budžetski deficit ili planirani neraspoređeni budžetski suficit.

(6) Ostvareni neraspoređeni suficit budžeta iz prethodnih fiskalnih godina može se raspoređivati samo na osnovu odluke Narodne skupštine Republike Srpske (u daljem tekstu: Narodna skupština), odnosno odluke skupštine općine, grada ili nadležnog organa uprave fonda, tek nakon provedene analize kojom se utvrđuje iznos sredstava stvarno raspoloživih za raspodjelu, na koju je Ministarstvo finansija (u daljem tekstu: Ministarstvo) dalo saglasnost.

(7) Odluka o raspodjeli neraspoređenog budžetskog suficita iz prethodnih fiskalnih godina predstavlja izmjenu strukture i/ili proširenje budžetskog okvira.

(8) Nepokriveni budžetski deficit utvrđen u toku fiskalne godine može se pokriti smanjenjem tekuće budžetske potrošnje, smanjenjem izdataka za nefinansijsku imovinu, zaduživanjem u zemlji ili inozemstvu ili na drugi način u skladu sa zakonom.

(9) Izmirenje obaveza nepokrivenog budžetskog deficita utvrđenog u prethodnim fiskalnim godinama u tekućoj fiskalnoj godini iskazuje se kao otplata duga.

III. PRIPREMA I DONOŠENJE BUDŽETA

Član 15.

(1) Budžet se priprema, donosi i izvršava na osnovu standardnih budžetskih klasifikacija.

(2) Standardne budžetske klasifikacije obuhvaćaju fondovsku, organizacionu, ekonomsku, podekonomsku (subanalitičku), funkcionalnu i programsku (projektnu) klasifikaciju.

(3) Ministar finansija (u daljem tekstu: ministar) donosi pravilnik kojim se definišu standardne budžetske klasifikacije.

(4) Budžet Republike, općina, gradova i fondova obavezno se donosi na nivou općeg računovodstvenog fonda, budžetskih organizacija ili potrošačkih jedinica, sintetičkih ekonomskih kodova i odjeljaka funkcionalne klasifikacije.

Član 16.

(1) Priprema i izrada budžeta zasniva se na Dokumentu okvirnog budžeta (u daljem tekstu: DOB).

(2) DOB je akt koji sadrži makroekonomske projekcije i prognoze budžetskih sredstava i izdataka za sljedeću godinu i naredne dvije fiskalne godine.

(3) DOB usvaja Vlada.

Član 17.

(1) Program javnih investicija je akt koji sadrži pregled javnih investicija u Republici za sljedeću godinu i naredne dvije fiskalne godine, a obuhvaća:

a) investicije koje su u toku, za čiju su realizaciju osigurani izvori finansiranja,

b) prioritetne investicije za čije finansiranje je izvjesno da će sredstva biti osigurana i

v) prioritetne investicije za koje nisu osigurani izvori finansiranja u momentu izrade programa.

(2) Vlada donosi odluku kojom se usvaja Program javnih investicija.

Član 18.

U postupku iniciranja, predlaganja i donošenja zakonskih, podzakonskih i drugih akata, potpisivanja sporazuma i ugovora i planiranja drugih aktivnosti, predlagači su dužni da imaju u vidu realne mogućnosti finansiranja navedenih aktivnosti, u skladu sa planiranim budžetskim okvirom za tekuću fiskalnu godinu, te projekcijama za naredne dvije godine datim u DOB-u.

Član 19.

(1) U postupku predlaganja zakonskih, podzakonskih i drugih akata, predlagač je dužan da sačini obrazloženje koje obavezno sadrži procjenu finansijskih efekata koje će na budžet imati realizacija predloženog akta.

(2) Procjena iz stava 1. ovog člana obavezno sadrži podatke o tome da li se predloženim zakonskim, podzakonskim i drugim aktom povećavaju ili smanjuju budžetska sredstva.

(3) Procjena iz st. 1. i 2. ovog člana obavezno sadrži:

a) predviđene promjene u budžetskim sredstvima za tekuću godinu i naredne dvije fiskalne godine,

b) prijedloge za osiguranje izvora sredstava za povećane izdatke i

v) prijedloge za osiguranje izvora finansiranja u slučaju smanjenja budžetskih sredstava, koje je rezultat predloženog akta iz stava 1. ovog člana.

Član 20.

Budžet se priprema i donosi prema budžetskom kalendaru.

Član 21.

Priprema i donošenje budžeta Republike vrši se prema sljedećem budžetskom kalendaru:

a) 15. februar - Ministarstvo budžetskim korisnicima dostavlja instrukciju o načinu i elementima izrade DOB-a,

b) 30. april - budžetski korisnici dostavljaju Ministarstvu prijedloge prioriteta za izradu DOB-a,

v) 30. jun - Vlada usvaja DOB,

g) 1. jul - Ministarstvo dostavlja DOB općinama, gradovima i fondovima,

d) 1. jul - Ministarstvo budžetskim korisnicima dostavlja instrukciju o načinu i elementima izrade nacrt budžeta za sljedeću fiskalnu godinu,

đ) 1. septembar - budžetski korisnici Ministarstvu dostavljaju budžetske zahtjeve za narednu fiskalnu godinu,

e) 15. oktobar - Ministarstvo dostavlja Vladi nacrt budžeta Republike za narednu fiskalnu godinu,

ž) 5. novembar - Vlada utvrđuje nacrt budžeta Republike za narednu fiskalnu godinu i dostavlja ga Narodnoj skupštini,

z) 15. novembar - Narodna skupština se izjašnjava o nacrtu budžeta Republike za narednu fiskalnu godinu,

ii) 1. decembar - Vlada utvrđuje prijedlog budžeta Republike za narednu fiskalnu godinu i dostavlja ga Narodnoj skupštini i

jj) 15. decembar - Narodna skupština donosi odluku o usvajanju budžeta Republike za narednu fiskalnu godinu.

Član 22.

Postupak pripreme i donošenja budžeta Republike počinje dostavljanjem instrukcije o načinu i elementima izrade DOB-a, koja sadrži:

a) osnovne ekonomske pretpostavke i smjernice za pripremu DOB-a,

b) tabele pregleda prioriteta budžetskih korisnika i

v) dinamiku i rokove pripreme DOB-a.

Član 23.

U skladu sa DOB-om, Ministarstvo budžetskim korisnicima dostavlja instrukciju o načinu i elementima izrade nacrt budžeta Republike, koja sadrži:

a) osnovne ekonomske pretpostavke i smjernice za pripremu budžeta Republike.

b) procjenu sredstava budžeta Republike za narednu fiskalnu godinu.

v) prijedlog okvirnog iznosa budžetskih izdataka za svakog budžetskog korisnika u narednoj fiskalnoj godini i

g) postupak i dinamiku pripreme budžeta Republike i izrade budžetskih zahtjeva budžetskih korisnika za narednu fiskalnu godinu.

Član 24.

(1) Budžetski korisnici koji u svojoj nadležnosti imaju niže budžetske jedinice obavezni su da im prosljede instrukcije iz čl. 22. i 23. ovog zakona.

(2) Budžetski korisnici iz stava 1. ovog člana obavezni su da izrade zbirni budžetski zahtjev za sve budžetske jedinice u svojoj nadležnosti, a prema instrukciji Ministarstva.

Član 25.

(1) Na osnovu instrukcije iz člana 23. ovog zakona, budžetski korisnici izrađuju budžetski zahtjev koji se sastoji od:

a) zahtjeva za budžetske izdatke, sa podacima o postojećim aktivnostima i uslugama budžetskog korisnika i

b) zahtjeva za dodatna sredstva za budžetske izdatke čije finansiranje ne može da se uskladi sa ograničenjima sadržanim u instrukcijama Ministarstva, sa prijedlogom prioriteta koji treba da budu razmotreni u postupku donošenja budžeta za narednu fiskalnu godinu.

(2) Uz zahtjev iz stava 1. ovog člana obavezno se dostavlja obrazloženje u pisanoj formi koje sadrži podatke o organizacionoj strukturi budžetskog korisnika, njegovim aktivnostima i uslugama, pregled sredstava i uposlenih koji su neophodni za obavljanje aktivnosti i pružanje usluga u okviru budžetskih izdataka, kao i opis i razloge obavljanja aktivnosti za koje se traže dodatna sredstva.

Član 26.

Ministarstvo razmatra zahtjeve budžetskih korisnika, imajući pritom u vidu raspoloživa sredstva i planirane izdatke, kao i podatke i obrazloženja pribavljena u skladu sa članom 25. ovog zakona, po potrebi obavlja konsultacije sa budžetskim korisnicima i priprema nacrt budžeta Republike za narednu fiskalnu godinu.

Član 27.

Utvrđivanje nacrt i prijedloga budžeta Republike vrši se prema sljedećoj proceduri:

a) Ministarstvo dostavlja Vladi nacrt budžeta Republike za narednu fiskalnu godinu,

b) Vlada, po potrebi, od Ministarstva traži dodatne informacije ili objašnjenja koja se odnose na nacrt budžeta Republike,

v) Vlada utvrđuje nacrt budžeta Republike za narednu fiskalnu godinu i sa usvojenim izmjenama prosljeđuje ga Narodnoj skupštini na razmatranje,

g) Narodna skupština se izjašnjava o nacrtu budžeta Republike za narednu fiskalnu godinu,

d) Vlada utvrđuje prijedlog budžeta Republike za narednu fiskalnu godinu i dostavlja ga Narodnoj skupštini na razmatranje i usvajanje i

d) Narodna skupština donosi odluku o usvajanju budžeta Republike za narednu fiskalnu godinu.

Član 28.

Priprema i donošenje budžeta općina i gradova vrši se prema sljedećem budžetskom kalendaru:

a) 5. jul - općine i gradovi analiziraju DOB,

b) 20. jul - općinski i gradski organ uprave nadležan za finansije budžetskim korisnicima dostavlja uputstvo za pripremu nacra budžeta za narednu fiskalnu godinu,

v) 15. septembar - budžetski korisnici općinskom i gradskom organu uprave nadležnom za finansije dostavljaju budžetske zahtjeve za narednu fiskalnu godinu,

g) 15. oktobar - općinski i gradski organi uprave nadležni za finansije pripremaju nacrt budžeta, vodeći računa o smjernicama sadržanim u DOB-u,

d) 1. novembar - nadležni izvršni općinski i gradski organi uprave utvrđuju nacrt budžeta i dostavljaju ga Ministarstvu radi dobivanja preporuka,

d) 15. novembar - skupštine općina i gradova se izjašnjavaju o nacrtu budžeta,

e) 20. novembar - izvršni općinski i gradski organi uprave Ministarstvu dostavljaju prijedlog budžeta na saglasnost,

ž) 5. decembar - prijedlog budžeta općine i grada za narednu fiskalnu godinu usaglašen sa Ministarstvom izvršni organ općine i grada dostavlja skupštini općine i grada na usvajanje,

z) 15. decembar - skupština općine i grada donosi odluku o usvajanju budžeta za narednu fiskalnu godinu i

i) 24. decembar - općinski i gradski organi uprave Ministarstvu dostavljaju usvojeni budžet, odluku o usvajanju i odluku o izvršenju budžeta za narednu fiskalnu godinu.

Član 29.

Općinski organ uprave nadležan za finansije, u skladu sa DOB-om, dostavlja budžetskim korisnicima uputstvo za pripremu budžeta općina i gradova za narednu fiskalnu godinu, koje sadrži:

a) osnovne ekonomske pretpostavke i smjernice za pripremu nacra budžeta općina i gradova za narednu fiskalnu godinu,

b) opis planirane politike jedinica lokalne samouprave,

v) procjene budžetskih sredstava i izdataka općina i gradova za narednu fiskalnu godinu,

g) prijedlog okvirnog iznosa budžetskih izdataka za svakog korisnika sredstava općinskih i gradskih budžeta u narednoj fiskalnoj godini i

d) postupak i dinamiku pripreme budžeta općina i gradova.

Član 30.

Odredbе iz čl. 25. i 26. ovog zakona koje se odnose na pripremu nacra budžeta Republike shodno se primjenjuju i na postupak donošenja budžeta općina i gradova.

Član 31.

Utvrđivanje nacra i prijedloga budžeta općina i gradova provodi se prema sljedećoj proceduri:

a) općinski i gradski organ uprave nadležan za finansije dostavlja nacrt budžeta općine, odnosno grada nadležnom izvršnom organu općine i grada,

b) nadležni izvršni organ općine i grada po potrebi od općinskog i gradskog organa uprave nadležnog za finansije zahtijeva dodatne informacije ili obrazloženja koja se odnose na nacrt budžeta općine i grada za narednu fiskalnu godinu,

v) nadležni izvršni organ općine i grada utvrđuje nacrt budžeta općine i grada i dostavlja ga Ministarstvu,

g) Ministarstvo daje preporuke na dostavljeni nacrt budžeta općine i grada,

d) nadležni izvršni organ općine i grada dostavlja skupštini općine i grada nacrt budžeta općine i grada na izjašnjenje,

d) skupština općine i grada se izjašnjava o nacrtu budžeta općine i grada,

e) nadležni izvršni organ općine i grada utvrđuje prijedlog budžeta i dostavlja ga Ministarstvu sa ugrađenim preporukama.

ž) Ministarstvo daje saglasnost na dostavljeni prijedlog budžeta općine i grada i

z) skupština općine i grada, nakon pribavljene saglasnosti od Ministarstva, donosi odluku o usvajanju budžeta općine i grada za narednu fiskalnu godinu.

Član 32.

(1) Narodna skupština može da promijeni predloženi budžet Republike, a skupštine općina, odnosno gradova predložene budžete općina, odnosno gradova u skladu sa sljedećim principima:

a) prijedlozi o povećanju budžetskih izdataka moraju da sadrže mjere za povećanje budžetskih sredstava ili za smanjenje ostalih budžetskih izdataka za isti iznos i

b) povećanje budžetskih sredstava mora da bude usklađeno sa općim makroekonomskim okvirom.

(2) Ako skupštine općina i gradova izvrše promjenu predloženog budžetskog okvira na koji je Ministarstvo prethodno dalo saglasnost, općine i gradovi su dužni da posebno obrazlože nastale promjene predloženog budžeta i da ih, zajedno sa obrazloženjem, dostave Ministarstvu.

Član 33.

(1) Na prijedlog Vlade, Narodna skupština donosi zakon o izvršenju budžeta Republike Srpske.

(2) Na prijedlog izvršnog organa općine ili grada, skupština općine ili grada donosi odluku o izvršenju budžeta općine ili grada.

Član 34.

Budžet fonda priprema se i donosi prema sljedećem budžetskom kalendaru:

a) 5. jul - fond analizira DOB,

b) 15. novembar - fond priprema nacrt budžeta za narednu fiskalnu godinu, imajući u vidu smjernice date u DOB-u i dostavlja ga Ministarstvu na mišljenje,

v) 1. decembar - zajedno sa utvrđivanjem prijedloga budžeta Republike, Vlada daje saglasnost na prijedlog budžeta fonda za narednu fiskalnu godinu i

g) 15. decembar - nadležni organ fonda donosi odluku o usvajanju budžeta za narednu fiskalnu godinu.

Član 35.

(1) Rebalansom budžeta Republike, općine, grada ili fonda, koji na prijedlog Vlade, odnosno nadležnog izvršnog organa općine, grada ili fonda usvaja Narodna skupština, skupština općine ili grada, odnosno nadležni organ fonda, vrši se usklađivanje budžetskih sredstava i izdataka na nižem, višem ili istom nivou.

(2) Rebalans iz stava 1. ovog člana provodi se po postupku identičnom postupku za donošenje budžeta.

Član 36.

Izrada Programa javnih investicija realizira se prema sljedećem kalendaru:

a) 15. februar - Ministarstvo budžetskom korisniku dostavlja informaciju o projektu,

b) 30. april - budžetski korisnici Ministarstvu dostavljaju popunjene obrasce za izradu nacrtu Programa javnih investicija,

v) 30. juni - Vlada usvaja nacrt programa javnih investicija,

g) od 1. do 25. septembra - obavljaju se konsultacije između Ministarstva i budžetskih korisnika u vezi sa izradom prijedloga programa javnih investicija,

d) 1. novembar - budžetski korisnici dostavljaju revidirane obrasce za izradu prijedloga programa javnih investicija i

đ) 30. decembar - Vlada usvaja prijedlog programa javnih investicija.

Član 37.

(1) Narodna skupština donosi odluku kojom usvaja budžet Republike za svaku fiskalnu godinu.

(2) Skupština općine, odnosno grada i nadležni organ fonda donosi odluku kojom usvaja budžet za svaku fiskalnu godinu.

(3) Budžet Republike objavljuje se u "Službenom glasniku Republike Srpske", a budžet općina i gradova objavljuje se u službenim glasilima općina i gradova.

(4) Odluka o davanju saglasnosti na prijedlog budžeta fondova objavljuje se u "Službenom glasniku Republike Srpske".

Član 38.

(1) Budžet se donosi za period od jedne fiskalne godine i važi za godinu za koju je donesen.

(2) U slučaju da budžet ne bude usvojen prije početka naredne fiskalne godine, Narodna skupština, skupština općine ili grada, odnosno nadležni organ fonda donose odluku o privremenom finansiranju, a najduže za period od 1. januara do 30. juna tekuće fiskalne godine.

(3) Ukoliko odluka iz stava 2. ovog člana ne bude donesena do isteka tekuće fiskalne godine, 1. januara naredne fiskalne godine na snagu stupa privremeno finansiranje prvog kvartala tekuće godine, u visini jedne četvrtine budžeta usvojenog za prethodnu fiskalnu godinu.

(4) Privremeno finansiranje u smislu stava 2. ovog člana vrši se najviše do visine ukupnih budžetskih prihoda ostvarenih u istom periodu prethodne fiskalne godine, umanjениh za primljene grantove u tom periodu.

(5) Struktura i vrsta rashoda u periodu privremenog finansiranja proporcionalno moraju odgovarati strukturi i vrsti ostvarenih rashoda u istom periodu prethodne godine, osim u mjeri u kojoj promjene broja ili statusa pojedinačnih budžetskih korisnika čije finansiranje se vrši iz budžeta mogu da utiču na strukturu i vrstu rashoda u periodu privremenog finansiranja.

(6) Ukoliko izvršni organ općine ili grada, odnosno nadležni organ fonda, u skladu sa procedurom utvrđenom ovim zakonom, najkasnije do 31. marta tekuće fiskalne godine ne pripremi i ne dostavi prijedlog budžeta na usvajanje skupštini općine ili grada, odnosno ovlaštenom organu fon-

da, skupština općine ili grada, odnosno ovlašten organ fonda može u skladu sa procedurom utvrđenom ovim zakonom samostalno da pripremi i usvoji budžet za tekuću fiskalnu godinu.

(7) Ako budžet ne bude usvojen do 30. juna tekuće fiskalne godine, sredstva sa transakcionih računa Republike, općina, gradova i fondova ne mogu se koristiti sve do usvajanja budžeta.

IV. IZVRŠENJE BUDŽETA

Član 39.

(1) Izvršenje budžeta u jednoj fiskalnoj godini obuhvaća budžetska sredstva i budžetske izdatke ostvarene do 31. decembra tekuće fiskalne godine, kao i sredstva i izdatke ostvarene nakon tog datuma, ali ne poslije isteka roka za izradu i dostavljanje godišnjih finansijskih izvještaja, ako su ispunjeni zakonski uvjeti da se iznos tih sredstava, odnosno izdataka uključi u budžet tekuće fiskalne godine.

(2) Budžetska likvidnost se planira na osnovu budžetskih sredstava i izdataka, u okviru operativnih finansijskih planova za izvršenje budžeta.

(3) Operativni finansijski planovi za izvršenje budžeta predstavljaju preglede planiranih budžetskih sredstava i izdataka u određenom periodu kraćem od jedne fiskalne godine.

(4) Izvršenje budžeta Republike provodi se na osnovu Zakona o izvršenju budžeta, a izvršenje budžeta općina, gradova i fondova na osnovu odluke o izvršenju budžeta.

Član 40.

(1) Budžetskim korisnicima i fondovima, definiranim ovim zakonom, dozvoljeno je da stvaraju obaveze i da koriste sredstva samo za namjene i do visine raspoloživih sredstava utvrđenih budžetom.

(2) Budžetski korisnici sa planiranim budžetskim sredstvima raspolazu prema prioritetima utvrđenim operativnim finansijskim planom.

(3) Korisnici budžetskih sredstava dužni su da sredstva utvrđena u budžetu koriste rukovodeći se načelima racionalnosti i štednje.

(4) Ministar donosi pravilnik kojim se uređuju kriteriji za sticanje statusa budžetskog korisnika u smislu praćenja namjenskog trošenja odobrenih budžetskih sredstava, te pripreme i objave odgovarajućih izvještaja.

Član 41.

(1) Izuzetno od odredaba člana 40. ovog zakona, Zakonom ili odlukom kojima se uređuje izvršenje budžeta može biti predviđena mogućnost preraspodjele (realokacije) budžetskih sredstava u okviru budžetskog korisnika i između budžetskih korisnika.

(2) U slučajevima iz stava 1. ovog člana, Zakonom, odnosno odlukom o izvršenju budžeta obavezno se utvrđuju precizna ograničenja u pogledu visine i namjene sredstava koja mogu biti realocirana.

Član 42.

(1) Ako se u toku fiskalne godine izdaci povećaju ili sredstva smanje, Vlada na prijedlog Ministarstva, odnosno nadležni izvršni organ općine, grada i fonda, na prijedlog organa nadležnog za finansije, mogu donijeti odluku o privremenom obustavljanju izvršenja budžeta u periodu koji nije duži od 45 dana.

(2) Odlukom o privremenom obustavljanju izvršenja može se:

a) zaustaviti stvaranje dijela kratkoročnih obaveza,

b) predložiti produženje ugovornog roka za plaćanje,

v) zaustaviti davanje odobrenja za zaključivanje ugovora i

g) zaustaviti prijenos sredstava prema planiranim iznosima za tromjesečje ili neki drugi period.

(3) Mjere privremenog obustavljanja izvršenja moraju biti primijenjene na sve budžetske korisnike.

(4) O odluci iz stava 1. ovog člana Vlada obavještava Narodnu skupštinu, a nadležni izvršni organ općine, grada ili fonda obavještava skupštinu općine i grada, odnosno nadležni organ fonda.

Član 43.

(1) Budžetska rezerva predstavlja dio planiranih sredstava budžeta koji se raspoređuje na osnovu posebnih odluka Vlade, odnosno izvršnog organa općina, gradova i fondova.

(2) Sredstva budžetske rezerve mogu se koristiti za:

- a) pokrivanje nepredviđenih izdataka za koje nisu planirana sredstva u budžetu,
- b) budžetske izdatke za koje se u toku godine pokaže da planirana budžetska sredstva nisu bila dovoljna,
- v) privremeno izvršavanje obaveza budžeta usljed smanjenog opsega budžetskih sredstava i
- g) izuzetno za ostale namjene, u skladu sa odlukama Vlade, odnosno izvršnog organa općina, gradova i fondova.

Član 44.

(1) Budžetska rezerva planira se u iznosu do 2,5% od ukupno planiranih budžetskih prihoda, umanjениh za planirane grantove za tekuću fiskalnu godinu.

(2) Izvještaj o utrošku sredstava budžetske rezerve polugodišnje se dostavlja Vladi, nadležnom izvršnom organu općine ili grada, odnosno nadležnom organu fonda.

Član 45.

(1) Ministarstvo izvještava Vladu tromjesečno o izvršenju budžeta Republike za tekuću fiskalnu godinu.

(2) Ministarstvo je obavezno da Vladi do 31. maja tekuće fiskalne godine podnese izvještaj o izvršenju budžeta Republike za prvo tromjesečje tekuće fiskalne godine.

(3) Ministarstvo je obavezno da Vladi do 30. novembra tekuće fiskalne godine podnese izvještaj o izvršenju budžeta Republike u periodu od 1. januara do 30. septembra tekuće fiskalne godine.

(4) Izvještaj o izvršenju budžeta Republike od 1. januara do 31. marta, odnosno od 1. januara do 30. septembra tekuće fiskalne godine obavezno sadrži:

- a) prikaz fiskalnog stanja i makroekonomskih kretanja,
- b) paralelni prikaz planiranih i ostvarenih budžetskih sredstava i izdataka, te objašnjenja mogućih razlika,
- v) prikaz zaduživanja Republike,
- g) prijedlog mjera za poboljšanje stanja, ako to zahtijevaju okolnosti,
- d) podatke o korištenju budžetske rezerve i
- đ) podatke o izvršenim realokacijama.

Član 46.

(1) Ministarstvo je obavezno da Vladi do 31. augusta tekuće fiskalne godine podnese izvještaj o izvršenju budžeta Republike za prvo polugodište tekuće fiskalne godine.

(2) Ministarstvo je obavezno da Vladi do 30. aprila tekuće fiskalne godine podnese izvještaj o izvršenju budžeta Republike za prethodnu fiskalnu godinu.

(3) Vlada polugodišnje i godišnje Narodnoj skupštini podnosi izvještaj o izvršenju budžeta Republike.

(4) Vlada je obavezna da Narodnoj skupštini do 30. septembra tekuće fiskalne godine podnese izvještaj o izvršenju budžeta Republike za prvo polugodište tekuće fiskalne godine.

(5) Vlada je obavezna da Narodnoj skupštini do 31. maja tekuće fiskalne godine podnese izvještaj o izvršenju budžeta Republike za prethodnu fiskalnu godinu.

Član 47.

(1) Izvještaj o izvršenju budžeta Republike iz člana 46. ovog zakona obavezno sadrži:

- a) pregled budžetskih sredstava i izdataka koje je Narodna skupština odobrila u budžetu Republike u prethodnoj godini,
- b) pregled ostvarenih budžetskih sredstava i izdataka u toku prethodne fiskalne godine, koji su prikazani tako da se jasno može vidjeti razlika između odobrenog i izvršenog budžeta,
- v) objašnjenje većih odstupanja,
- g) podatke o zaduživanju i upravljanju dugom,
- d) podatke o korištenju budžetske rezerve,
- d) podatke o garancijama datim u toku prethodne fiskalne godine,
- e) početno i završno stanje jedinstvenih računa trezora i računa posebnih namjena i
- ž) podatke o izvršenim realokacijama.

(2) Osim podataka i informacija iz stava 1. ovog člana, u izvještaju o izvršenju budžeta Republike za prethodnu fiskalnu godinu obavezno moraju biti prikazani i podaci o početnom i završnom stanju imovine, obaveza i izvora sredstava.

(3) Ministar donosi pravilnik kojim se uređuju forma i sadržaj budžeta i izvještaj o izvršenju budžeta.

Član 48.

(1) Odredbe čl. 45, 46. i 47. ovog zakona shodno se primjenjuju i na općine, gradove i fondove.

(2) Izvještaji o izvršenju budžeta općina i gradova za svako tromjesečje tekuće fiskalne godine dostavljaju se Ministarstvu u roku od 15 dana od dana njihovog donošenja.

(3) Izvještaji o izvršenju budžeta fondova dostavljaju se Ministarstvu i nadležnom ministarstvu u roku od 15 dana od dana njihovog donošenja.

(4) Nadležno ministarstvo tromjesečno informira Vladu o izvršenju budžeta fondova.

(5) Pored izvještaja iz st. 2. i 3. ovog člana općine, gradovi i fondovi dužni su da dostavljaju i druge izvještaje, u skladu sa aktima koje donese Ministarstvo.

Član 49.

(1) Za izvršenje budžeta Republike Vlada je odgovorna Narodnoj skupštini.

(2) Za izvršenje budžeta općina i gradova, izvršni organi općina i gradova odgovorni su skupštinama općina i gradova.

(3) Za izvršenje budžeta fondova, fondovi su odgovorni Vladi.

(4) Izvještaj o izvršenju budžeta podnosi se na način koji je određen ovim zakonom.

V. ZADUŽIVANJE I OTPLATA DUGA

Član 50.

(1) Zaduživanje predstavlja realizaciju ugovorenih kredita i zajmova, emitiranje hartija od vrijednosti i izdavanje garancija u toku fiskalne godine.

(2) Servisiranje duga obuhvaća otplatu glavnice, kamate i servisnih troškova po osnovu kredita i zajmova, obaveza po osnovu emitiranih hartija od vrijednosti, aktiviranih garancija, finansijskog lizinga, drugih finansijskih obaveza, te izmirenje obaveza nepokrivenog deficita utvrđenog u prethodnim fiskalnim godinama.

(3) U budžetu Republike, općina, gradova i fondova planiraju se sredstva po osnovu novog zaduživanja i sredstva za servisiranje glavnice duga, kamate i servisnih troškova, za svaku fiskalnu godinu na koju se odnose, uključujući i procijenjeni iznos aktiviranih datih garancija.

Član 51.

Ministarstvo dostavlja Vladi najkasnije do 30. juna tekuće fiskalne godine informaciju o dugu za prethodnu godinu, koju Vlada dostavlja Narodnoj skupštini.

Član 52.

Otplata glavnice, kamata i servisnih troškova po osnovu duga Republike vrši se sa Jedinštenog računa trezora i podračuna za servis vanjskog duga u Centralnoj banci Bosne i Hercegovine.

Član 53.

Način i postupak zaduživanja, izdavanja garancija i emisije hartija od vrijednosti Republike, općina, gradova i fondova, osiguranje sredstava za otplatu glavnice duga, kamate i servisnih troškova, vođenje evidencije o dugu, garancijama i hartijama od vrijednosti, kao i druga pitanja koja se odnose na dug, garancije i hartije od vrijednosti uređuju se posebnim zakonom.

VI. BUDŽETSKI I RAČUNOVODSTVENI PROPISI I IZVJEŠTAJI, BUDŽETSKA INSPEKCIJA, INTERNA KONTROLA I INTERNA REVIZIJA

Član 54.

(1) Pojedinačni budžetski korisnici i fondovi obavezni su da godišnji finansijski izvještaj pripreme do kraja februara tekuće godine za prethodnu fiskalnu godinu.

(2) Za istinitost i tačnost informacija prezentiranih u godišnjim finansijskim izvještajima, kao i tačnost i pravovremenost pripreme finansijskih izvještaja pojedinačnih budžetskih korisnika odgovorni su rukovodioci tih budžetskih korisnika i lica zadužena za računovodstvo kod tih budžetskih korisnika.

Član 55.

(1) Ministarstva, općine, gradovi i fondovi obavezni su da konsolidirani godišnji finansijski izvještaj za određeni nivo vlasti u Republici pripreme do 31. marta tekuće godine za prethodnu fiskalnu godinu.

(2) Za tačnost i pravovremenost pripreme i prezentacije konsolidiranih godišnjih finansijskih izvještaja za određeni nivo vlasti u Republici odgovorni su ministar, načelnici općina, odnosno gradonačelnici, direktori fondova i lica zadužena za pripremu tih izvještaja.

Član 56.

Općine, gradovi i fondovi obavezni su da Ministarstvu dostave konsolidirani godišnji finansijski izvještaj do 5. aprila tekuće za prethodnu fiskalnu godinu.

Član 57.

Ministarstvo je obavezno da izradi konsolidirani godišnji finansijski izvještaj korisnika budžeta Republike, konsolidirani godišnji finansijski izvještaj korisnika budžeta općina i gradova i konsolidirani godišnji finansijski izvještaj fondova do 30. aprila tekuće godine za prethodnu fiskalnu godinu.

Član 58.

Sveobuhvatni konsolidirani godišnji finansijski izvještaj korisnika budžeta Republike, općina, gradova i fondova izrađuje Ministarstvo do 20. maja tekuće godine za prethodnu fiskalnu godinu.

Član 59.

(1) Radi provođenja odredaba ovog zakona koje se odnose na prezentiranje informacija, računovodstvo i računovodstvene politike, budžetske klasifikacije, finansijsko izvještavanje i drugo, ministar donosi:

a) pravilnik kojim se uređuju načela i principi pripreme i prezentiranja informacija za potrebe ovlaštenih eksternih korisnika,

b) pravilnik o računovodstvu, računovodstvenim politikama i računovodstvenim procjenama budžetskih korisnika,

v) pravilnik o budžetskim klasifikacijama, sadržini računa i primjeni kontnog plana za korisnike prihoda budžeta Republike, općina i gradova i fondova,

g) pravilnik o finansijskom izvještavanju za korisnike prihoda budžeta Republike, općina i gradova i fondova i

d) naredbu o uplaćivanju određenih prihoda budžeta Republike, općina i gradova i fondova.

(2) Ministar donosi uputstva, instrukcije, naredbe, procedure i ostala podzakonska akta od značaja za provođenje ovog zakona.

Član 60.

(1) Budžetski korisnici dužni su da uspostave sistem interne kontrole u skladu sa općeprihvaćenim standardima i smjernicama interne kontrole, kojim treba da se osigura zakonito, efikasno, efektivno, odgovorno i transparentno trošenje javnih sredstava.

(2) Praćenje i ocjenjivanje sistema internih kontrola vrši interna revizija, u skladu sa propisima kojima se uređuje oblast interne revizije.

(3) Naknadnu kontrolu zakonitosti trošenja budžetskih sredstava vrši budžetska inspekcija.

(4) Rad budžetske inspekcije zasniva se na godišnjem planu rada i odvija se kontinuirano u toku godine.

(5) Budžetska inspekcija dužna je da najmanje dva puta godišnje sačini izvještaj o radu i dostavi ga nadležnom organu.

(6) Ministar donosi pravilnik kojim se uređuje rad budžetske inspekcije.

Član 61.

(1) Ministar donosi rješenje o inspekcijskoj kontroli namjenskog i zakonitog korištenja sredstava budžetskih korisnika za određeni period.

(2) Inspekcijsku kontrolu iz stava 1. ovog člana vrši budžetski inspektor, kome budžetski korisnici imaju obaveznu da daju na uvid svu raspoloživu dokumentaciju od značaja za provođenje inspekcijске kontrole u skladu sa rješenjem ministra.

(3) Nakon izvršene inspekcijске kontrole kod budžetskog korisnika, budžetski inspektor sačinjava zapisnik o utvrđenom stanju.

(4) Ako zapisnikom o izvršenoj inspekcijskoj kontroli konstatira povrede, odnosno nepravilnosti u primjeni zakona, budžetski inspektor je obavezan da u roku od deset dana od dana dostavljanja zapisnika budžetskom korisniku donese rješenje kojim mu nalaže otklanjanje utvrđenih povreda zakona, odnosno nepravilnosti i odredi rok za njihovo otklanjanje, kao i da utvrdi druge zakonom predviđene mjere.

Član 62.

(1) Protiv rješenja budžetskog inspektora može se podnijeti žalba u roku od osam dana od dana prijema rješenja.

(2) Žalba se podnosi ministru, posredstvom budžetske inspekcije.

(3) Ministar imenuje članove Odbora za žalbe, kojem budžetska inspekcija prosljeđuje primljenu žalbu sa kompletnim predmetom.

(4) Ministar, na osnovu mišljenja Odbora za žalbe sačinjenog u pisanoj formi, donosi rješenje koje je konačno u upravnom postupku.

(5) Protiv rješenja iz stava 4. ovog člana može se pokrenuti upravni spor pred nadležnim sudom.

Član 63.

(1) Ako se naložene mjere po konačnom rješenju ne otklone u ostavljenom roku, ministar, za budžetske korisnike koji ne posjeduju račune otvorene kod banaka koje imaju dozvolu za obavljanje poslova platnog prometa u Republici (budžetski korisnici koji su u potpunosti u sistemu trezorskog poslovanja), donosi rješenje o zabrani raspolaganja budžetskim sredstvima i sredstvima ostalih izvora finansiranja.

(2) Ako se naložene mjere po konačnom rješenju ne otklone u ostavljenom roku, ministar za budžetske korisnike koji posjeduju račune otvorene kod banaka koje imaju dozvolu za obavljanje poslova platnog prometa u Republici (budžetski korisnici koji su djelimično ili potpuno izvan glavne knjige trezora) donosi rješenje o zabrani raspolaganja novčanim sredstvima sa transakcionih računa i računa posebnih namjena.

(3) Rješenje o zabrani raspolaganja sredstvima iz stava 1. ovog člana dostavlja se budžetskom korisniku, Resoru za budžet i javne finansije, Resoru za trezor i nadležnoj službi za finansije jedinica lokalne samouprave i fondova.

(4) Rješenje o zabrani raspolaganja sredstvima iz stava 2. ovog člana dostavlja se budžetskom korisniku, Resoru za budžet i javne finansije, Resoru za trezor i nadležnoj službi za finansije jedinica lokalne samouprave i fondova i banka kod kojih su otvoreni računi budžetskih korisnika.

(5) Zabrana raspolaganja sredstvima iz st. 1. i 2. ovog člana traje do otklanjanja utvrđenih nepravilnosti.

Član 64.

(1) Novčanom kaznom od 300 KM do 1.500 KM kaznit će se za prekršaj odgovorno lice:

a) ako prihode koje ostvare budžetski korisnici u zakonom propisanom procentu i u propisanom roku ne uplati u budžet Republike u skladu sa odredbama člana 8. ovog zakona,

b) koje uvede nove ili promijeni postojeće prihode budžeta Republike, općina, gradova i fondova suprotno odredbi člana 13. ovog zakona,

v) koje se u pripremi i donošenju budžeta ne pridržava odredaba čl. 21. do 38. ovog zakona.

g) ako ne osigura da budžet bude pripremljen u skladu sa odredbama člana 15. ovog zakona,

d) koje ne osigura da izvještaji o izvršenju budžeta sadrže dijelove propisane odredbama čl. 45. i 47. ovog zakona,

đ) ako izvještaji o izvršenju budžeta ne budu dostavljeni u rokovima propisanim odredbama čl. 45. i 46. ovog zakona.

e) koje izvrši ili odobri zaduživanje suprotno odredbama člana 53. ovog zakona,

ž) koje se ne pridržava odredaba sadržanih u propisima donesenim u skladu sa ovim zakonom i

z) koje u ostavljenom roku ne otkloni nepravilnosti utvrđene u skladu sa čl. 61. do 63. ovog zakona.

(2) Novčanom kaznom od 4.000 KM do 20.000 KM kaznit će se za prekršaj odgovorno lice ako se pri izvršenju budžeta ne pridržava odredaba čl. 39. do 44. ovog zakona.

VII. PRIJELAZNE I ZAVRŠNE ODREDBE

Član 65.

(1) Prihodi naplaćeni po osnovu poreza na promet proizvoda i usluga i drugih javnih prihoda ostvarenih primjenom zakona koji su bili na snazi do 31. decembra 2005. godine i naplaćeni prihodi po reprogramima javnih prihoda raspoređivat će se u skladu sa propisima i pravilima raspodjele koji su se primjenjivali do donošenja ovog zakona.

(2) Prihodi po osnovu poreza na dohodak građana ostvareni primjenom zakona koji je bio na snazi do 31. decembra 2006. godine raspoređivat će se u skladu sa propisima i pravilima raspodjele koji su se primjenjivali do donošenja Zakona o porezu na dohodak.

Član 66.

Do donošenja podzakonskih akata propisanih ovim zakonom primjenjivat će se propisi koji su važili do dana stupanja na snagu ovog zakona, ako nisu u suprotnosti sa odredbama ovog zakona.

Član 67.

Stupanjem na snagu ovog zakona prestaje važiti Zakon o budžetskom sistemu Republike Srpske ("Službeni glasnik Republike Srpske", br. 96/03, 14/04, 67/05, 34/06, 128/06, 117/07, 126/08 i 92/09).

Član 68.

Ovaj zakon stupa na snagu osmog dana od dana objave u "Službenom glasniku Republike Srpske".

Broj: 01-1891/12
13. decembra 2012. godine
Banja Luka

Predsjednik
Narodne skupštine,
Mr. Igor Radojičić, s.r.

2572

Na osnovu Amandmana XL tačka 2. na Ustav Republike Srpske ("Službeni glasnik Republike Srpske", broj 28/94), donosim

UKAZ

O PROGLAŠENJU ZAKONA O ZAŠTITI I SPAŠAVANJU U VANREDNIM SITUACIJAMA

Prolašavam Zakon o zaštiti i spašavanju u vanrednim situacijama, koji je Narodna skupština Republike Srpske usvojila na Dvadeset trećoj sjednici, održanoj 13. decembra 2012. godine, a Vijeće naroda 24. decembra 2012. godine konstatiralo da usvojenim Zakonom o zaštiti i spašavanju u vanrednim situacijama nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-4105/12
25. decembra 2012. godine
Banja Luka

Predsjednik
Republike,
Milorad Dodik, s.r.

ZAKON

O ZAŠTITI I SPAŠAVANJU U VANREDNIM SITUACIJAMA

I. OSNOVNE ODREDBE

Član 1.

Ovim zakonom uređuju se sistem zaštite i spašavanja u vanrednim situacijama, snage i subjekti zaštite i spašavanja, prava i obaveze republičkih organa uprave i drugih organa, organa jedinica lokalne samouprave, privrednih društava i drugih pravnih lica, prava i dužnosti građana, vanredne situacije i postupanje u vanrednim situacijama, organizacija i djelatnost civilne zaštite u sistemu zaštite i spašavanja i otklanjanja posljedica elementarnih nepogoda i drugih



Član 8.

U članu 21. u stavu 1. poslije broja: "5" dodaju se riječi: "stav 1.", a riječi: "30. juna 2014." zamjenjuju se riječima: "31. decembra 2014."

Poslije stava 1. dodaje se novi stav 2, koji glasi:

"(2) Pod glavnim dugom u smislu stava 1. ovog člana smatra se i dug čije je plaćanje odgođeno aktima Ministarstva, odnosno Poreske uprave."

Dosadašnji st. 2. i 3. postaju st. 3. i 4.

Član 9.

Ovaj zakon stupa na snagu osmog dana od dana objave u "Službenom glasniku Republike Srpske".

Broj: 01-881/14
15. juna 2014. godine
Banja Luka

Predsjednik
Narodne skupštine,
Mr. **Igor Radojičić**, s.r.

771

Na osnovu Amandmana XL. tačka 2. na Ustav Republike Srpske ("Službeni glasnik Republike Srpske", broj 28/94), donosi m

U K A Z

O PROGLAŠENJU ZAKONA O IZMJENAMA I DOPUNAMA
ZAKONA O BUDŽETSKOM SISTEMU
REPUBLIKE SRPSKE

Proglašavam Zakon o izmjenama i dopunama Zakona o budžetskom sistemu Republike Srpske, koji je Narodna skupština Republike Srpske usvojila na Dvadesetoj posebnoj sjednici, održanoj 15. juna 2014. godine, a Vijeće naroda 19. juna 2014. godine konstatiralo da usvojenim Zakonom o izmjenama i dopunama Zakona o izmjenama i dopunama Zakona o budžetskom sistemu Republike Srpske nije ugrožen vitalni nacionalni interes ni jednog konstituirajućega naroda u Republici Srpskoj.

Broj: 01-020-3176/14
19. juna 2014. godine
Banja Luka

Predsjednik
Republike,
Milorad Dodik, s.r.

Z A K O N

O IZMJENAMA I DOPUNAMA ZAKONA O BUDŽETSKOM
SISTEMU REPUBLIKE SRPSKE

Član 1.

U Zakonu o budžetskom sistemu Republike Srpske ("Službeni glasnik Republike Srpske", broj 121/12) u članu 8. u tački g) podt. 1. i 4. brišu se, a podt. 2. i 3. postaju podt. 1. i 2.

U tački d) podtačka 1) mijenja se i glasi:

"1) koncesione naknade za ustupljeno pravo za koncesije koje dodjeljuje Vlada Republike Srpske."

Član 2.

U članu 9. poslije tačke b) dodaje se nova tačka v), koja glasi:

"v) izuzetno od raspodjele iz tačke b) ovog člana, porez na prihode od samostalne djelatnosti i porez na osobna primanja dijele se između budžeta Republike i budžeta područja od posebne brige Republike, koja su kao takva određena zakonom kojim se uređuje Fond solidarnosti za obnovu Republike Srpske, u srazmjeri 50 : 50."

T. v) do e) postaju t. g) do ž).

Dosadašnja tačka d), koja postaje tačka d), mijenja se i glasi:

"d) koncesione naknade za korištenje, za koncesije koje dodjeljuje Vlada Republike Srpske, dijele se između budžeta Republike i budžeta općina i gradova na čijoj teritoriji se obavlja koncesiona djelatnost u srazmjeri:

- 1) 30 : 70 za razvijene jedinice lokalne samouprave,
- 2) 30 : 70 za srednje razvijene jedinice lokalne samouprave,
- 3) 20 : 80 za nerazvijene jedinice lokalne samouprave,
- 4) 10 : 90 za izrazito nerazvijene jedinice lokalne samouprave."

Poslije dosadašnje tačke e), koja postaje tačka ž), dodaju se nove t. z) i i), koje glase:

"z) prihodi od poreza na upotrebu, držanje i nošenje dobara:

1) porez na upotrebu motornih vozila koji se dijeli između budžeta Republike i Fonda solidarnosti za obnovu Republike Srpske u srazmjeri 70 : 30,

2) porez na registrirano oružje koji se dijeli između budžeta Republike i Fonda solidarnosti za obnovu Republike Srpske u srazmjeri 75 : 25 i

i) prihodi od naknada za korištenje prirodnih resursa u svrhu proizvodnje električne energije koji se dijele između budžeta općina i gradova i Fonda solidarnosti za obnovu Republike Srpske u srazmjeri 50 : 50."

Član 3.

U članu 11. poslije tačke ž) dodaju se nove t. z) i i), koje glase:

"z) koncesione naknade za ustupljeno pravo za koncesije koje dodjeljuju jedinice lokalne samouprave;

i) koncesione naknade za korištenje za koncesije koje dodjeljuju jedinice lokalne samouprave;"

Dosadašnja tačka z) postaje tačka j).

Član 4.

Ovaj zakon stupa na snagu osmog dana od dana objave u "Službenom glasniku Republike Srpske".

Broj: 01-883/14
15. juna 2014. godine
Banja Luka

Predsjednik
Narodne skupštine,
Mr. **Igor Radojičić**, s.r.

772

Na osnovu Amandmana XL. tačka 2. na Ustav Republike Srpske ("Službeni glasnik Republike Srpske", broj 28/94), donosi m

U K A Z

O PROGLAŠENJU ZAKONA O DOPUNAMA ZAKONA O
ZADUŽIVANJU, DUGU I GARANCIJAMA
REPUBLIKE SRPSKE

Proglašavam Zakon o dopunama Zakona o zaduživanju, dugu i garancijama Republike Srpske, koji je Narodna skupština Republike Srpske usvojila na Dvadesetoj posebnoj sjednici, održanoj 15. juna 2014. godine, a Vijeće naroda 19. juna 2014. godine konstatiralo da usvojenim Zakonom o dopunama Zakona o zaduživanju, dugu i garancijama Republike Srpske nije ugrožen vitalni nacionalni interes ni jednog konstituirajućega naroda u Republici Srpskoj.

Broj: 01-020-3177/14
19. juna 2014. godine
Banja Luka

Predsjednik
Republike,
Milorad Dodik, s.r.

Z A K O N

O DOPUNAMA ZAKONA O ZADUŽIVANJU, DUGU I
GARANCIJAMA REPUBLIKE SRPSKE

Član 1.

U Zakonu o zaduživanju, dugu i garancijama Republike Srpske ("Službeni glasnik Republike Srpske", broj 71/12) u članu 15. poslije stava 2. dodaje se novi stav 3, koji glasi:



prinosu u Jedinstveni sistem registracije, kontrole i naplate doprinosa.

(7) Za uplatioca doprinosa koji vrši uplatu doprinosa za obveznike doprinosa za penzijsko i invalidsko osiguranje iz Brčko Distrikta mjesto plaćanja doprinosa je Brčko Distrikt.

(8) Fizička lica koja su, u smislu ovog zakona uplatioci doprinosa, uplatu doprinosa vrše prema mjestu prebivališta.

(9) Izuzetno od st. 5. i 6. ovog člana, uplatioci doprinosa zajednički organi Bosne i Hercegovine i javna preduzeća Bosne i Hercegovine vrše uplatu doprinosa prema prebivalištu obveznika doprinosa u Republici.”.

Član 9.

Ovaj zakon objavljuje se u “Službenom glasniku Republike Srpske”, a stupa na snagu 1. januara 2016. godine.

Broj: 02/1-021-1523/15 Po ovlaštenju predsjednika
4. decembra 2015. godine Narodne skupštine,
Banja Luka **Nenad Stevandić, s.r.**

1836

Na osnovu Amandmana XL. tačka 2. na Ustav Republike Srpske (“Službeni glasnik Republike Srpske”, broj 28/94), donosim

U K A Z

O PROGLAŠENJU ZAKONA O IZMJENAMA I DOPUNAMA ZAKONA O TREZORU

Proglašavam Zakon o izmjenama i dopunama Zakona o trezoru, koji je Narodna skupština Republike Srpske usvojila na Dvanaestoj posebnoj sjednici, održanoj 4. decembra 2015. godine, a Vijeće naroda 14. decembra 2015. godine konstatiralo da usvojenim Zakonom o izmjenama i dopunama Zakona o trezoru nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-4057/15 Predsjednik
15. decembra 2015. godine Republike,
Banja Luka **Milorad Dodik, s.r.**

Z A K O N

O IZMJENAMA I DOPUNAMA ZAKONA O TREZORU

Član 1.

U Zakonu o trezoru (“Službeni glasnik Republike Srpske”, broj 28/13) u članu 2. u tački a) riječi i zarez: “Fond za penzijsko i invalidsko osiguranje Republike Srpske,” brišu se.

U tački n) riječ: “i” zamjenjuje se zarezom, a u tački nj) poslije riječi: “sektor” dodaje se riječ: “i” i nova tačka o), koja glasi:

“o) tehničko-organizacioni okvir za uspostavljanje i vođenje sistema knjigovodstva i računovodstva budžetskih korisnika je sistem trezorskog poslovanja”.

Član 2.

Poslije člana 31. dodaje se novi član 31a, koji glasi:

“Član 31a.

(1) Računi Fonda za penzijsko i invalidsko osiguranje Republike Srpske ugasit će se zaključno sa 31. decembrom 2015. godine.

(2) Fond za penzijsko i invalidsko osiguranje dužan je da svoju organizaciju i opće akte uskladi i da najkasnije od 1. januara 2016. bude uključen u Jedinstveni račun Trezora Republike.

(3) Fond penzijskog i invalidskog osiguranja dužan je da izvrši prijenos svih novčanih sredstava na Jedinstveni račun Trezora Republike, kao i svih podataka o imovini, potraživanjima i obvezama iz svojih poslovnih knjiga u glavnu knjigu Trezora Republike sa stanjem na dan 31. decembar 2015. godine.”.

Član 3.

Ovaj zakon objavljuje se u “Službenom glasniku Republike Srpske”, a stupa na snagu 1. januara 2016. godine.

Broj: 02/1-021-1524/15 Po ovlaštenju predsjednika
4. decembra 2015. godine Narodne skupštine,
Banja Luka **Nenad Stevandić, s.r.**

1837

Na osnovu Amandmana XL. tačka 2. na Ustav Republike Srpske (“Službeni glasnik Republike Srpske”, broj 28/94), donosim

U K A Z

O PROGLAŠENJU ZAKONA O IZMJENAMA I DOPUNAMA ZAKONA O BUDŽETSKOM SISTEMU REPUBLIKE SRPSKE

Proglašavam Zakon o izmjenama i dopunama Zakona o budžetskom sistemu Republike Srpske, koji je Narodna skupština Republike Srpske usvojila na Dvanaestoj posebnoj sjednici, održanoj 4. decembra 2015. godine, a Vijeće naroda 14. decembra 2015. godine konstatiralo da usvojenim Zakonom o izmjenama i dopunama Zakona o budžetskom sistemu Republike Srpske nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-4058/15 Predsjednik
15. decembra 2015. godine Republike,
Banja Luka **Milorad Dodik, s.r.**

Z A K O N

O IZMJENAMA I DOPUNAMA ZAKONA O BUDŽETSKOM SISTEMU REPUBLIKE SRPSKE

Član 1.

U Zakonu o budžetskom sistemu Republike Srpske (“Službeni glasnik Republike Srpske”, br. 121/12 i 52/14) u članu 2. u tački g) riječi i zarez: “Fond za penzijsko i invalidsko osiguranje Republike Srpske,” brišu se.

Član 2.

U članu 8. u tački i) riječ: “i” zamjenjuje se zarezom.

Poslije tačke i) dodaje se nova tačka j), koja glasi:

“j) doprinos za penzijsko i invalidsko osiguranje i”.

Dosadašnja tačka j) postaje tačka k).

Član 3.

U članu 12. tačka a) mijenja i glasi:

“a) doprinos za zdravstveno osiguranje, doprinos za osiguranje od nezaposlenosti i doprinos za dječju zaštitu.”.

Član 4.

Poslije člana 66. dodaju se novi čl. 66a. i 66b, koji glase:

“Član 66a.

Finansijski plan Fonda za penzijsko i invalidsko osiguranje Republike Srpske za 2016. godinu čini sastavni dio budžeta Republike Srpske za 2016. godinu.

Član 66b.

Prilikom izrade budžeta Republike Srpske za 2016. godinu čl. 21, 22, 23. i 25. ovog zakona, koji se odnose na pripremu budžeta Republike, ne primjenjuju se na Fond za penzijsko i invalidsko osiguranje Republike Srpske.”.

Član 5.

Ovaj zakon objavljuje se u “Službenom glasniku Republike Srpske”, a stupa na snagu 1. januara 2016. godine.

Broj: 02/1-021-1525/15
4. decembra 2015. godine
Banja Luka

Po ovlaštenju
predsjednika
Narodne skupštine,
Nenad Stevandić, s.r.

1838

Na osnovu člana 70. stav 1. tačka 2, člana 109. Ustava Republike Srpske, člana 182. i člana 186. stav 3. Poslovnika Narodne skupštine Republike Srpske (“Službeni glasnik Republike Srpske”, broj 31/11), Narodna skupština Republike Srpske, na Dvanaestoj posebnoj sjednici, održanoj 4. decembra 2015. godine, donijela je sljedeću

ODLUKU

O PRIJEVREMENOM STUPANJU NA SNAGU

Član 1.

U postupku donošenja Zakona o izmjenama Zakona o izvršenju Budžeta Republike Srpske za 2015. godinu utvrđeno je da postoje naročito opravdani razlozi da navedeni zakon stupi na snagu narednog dana od dana objave.

Član 2.

Ova odluka stupa na snagu narednog dana od dana objave u “Službenom glasniku Republike Srpske”.

Broj: 02/1-021-1520/15
4. decembra 2015. godine
Banja Luka

Po ovlaštenju predsjednika
Narodne skupštine,
Nenad Stevandić, s.r.

1839

Na osnovu člana 70. stav 1. tačka 3. Ustava Republike Srpske, člana 182. i člana 186. st. 1. i 2. Poslovnika Narodne skupštine Republike Srpske (“Službeni glasnik Republike Srpske”, broj 31/11), Narodna skupština Republike Srpske, na Dvanaestoj posebnoj sjednici, održanoj 4. decembra 2015. godine, donijela je sljedeću

ODLUKU

O USVAJANJU REBALANSA BUDŽETA REPUBLIKE SRPSKE ZA 2015. GODINU

I.

Narodna skupština Republike Srpske usvaja Rebalans budžeta Republike Srpske za 2015. godinu.

II.

Sastavni dio ove odluke je Rebalans budžeta Republike Srpske za 2015. godinu.

III.

Ova odluka stupa na snagu narednog dana od dana objave u “Službenom glasniku Republike Srpske”.

Broj: 02/1-021-1518/15
4. decembra 2015. godine
Banja Luka

Po ovlaštenju
predsjednika
Narodne skupštine,
Nenad Stevandić, s.r.

REBALANS BUDŽETA REPUBLIKE SRPSKE ZA 2015. GODINU - OPĆI DIO

Ekonomski kod	Opis	Rebalans budžeta Republike Srpske za 2015. godinu
1	2	3
	A. BUDŽETSKI PRIHODI	1.608.900.000
710000	Porezni prihodi	1.449.882.000
711000	Prihodi od poreza na dohodak i dobit	327.130.000
714000	Porezi na imovinu	11.940.000
715000	Porezi na promet proizvoda i usluga	28.812.000
717000	Indirektni porezi doznačeni od UIO	1.082.000.000
720000	Neporezni prihodi	159.018.000
721000	Prihodi od finansijske i nefinansijske imovine i pozitivnih kursnih razlika	20.925.000
722000	Naknade, pristojbe i prihodi od pružanja javnih usluga	108.392.000
723000	Novčane kazne	17.551.000
729000	Ostali neporezni prihodi	12.150.000
780000	Transferi između budžetskih jedinica	0
781000	Transferi između budžetskih jedinica različitih nivoa vlasti	0
782000	Transferi između budžetskih jedinica istog nivoa vlasti	0
	B. BUDŽETSKI RASHODI	1.545.352.300
410000	Tekući rashodi	1.219.913.000
411000	Rashodi za osobna primanja	705.744.300
412000	Rashodi po osnovu korištenja robe i usluga	98.721.500
413000	Rashodi finansiranja i drugi finansijski troškovi	59.015.600
414000	Subvencije	99.508.100
415000	Grantovi	25.111.600
416000	Doznake na ime socijalne zaštite koje se isplaćuju iz budžeta Republike, općina i gradova	231.811.900
417000	Doznake na ime socijalne zaštite koje isplaćuju institucije obaveznog socijalnog osiguranja	0
480000	Transferi između budžetskih jedinica	324.388.100
481000	Transferi između budžetskih jedinica različitih nivoa vlasti	290.687.300
482000	Transferi između budžetskih jedinica istog nivoa vlasti	33.700.800

ambalažu, postupku za dobivanje i oduzimanje ovlaštenja, uvjetima i postupku odobrenja ambalaže za prijevoz opasnih materija, kao i uvjetima za oduzimanje odobrenja za ambalažu za prijevoz opasnih materija (član 13. stav 6).

(4) Ministar saobraćaja i veza će u roku od šest mjeseci od dana stupanja na snagu ovog zakona donijeti pravilnike o:

1) uvjetima koje ispunjavaju pravna lica iz člana 13. stav 1. ovog zakona za izdavanje odobrenja za ambalažu, postupku za dobivanje i oduzimanje ovlaštenja, uvjetima i postupku odobrenja ambalaže za prijevoz opasnih materija, kao i uvjetima za oduzimanje odobrenja za ambalažu za prijevoz opasnih materija (član 13. stav 5),

2) uvjetima koje ispunjavaju ustanove koje obavljaju stručno osposobljavanje savjetnika, načinu i postupku stručnog osposobljavanja savjetnika, izgledu i roku važenja certifikata iz člana 34. stav 3. ovog zakona, kriterijima za izbor članova ispitne komisije, broju članova, načinu provođenja ispita i visini naknade (član 36. stav 3),

3) postupku i mjestu pregleda vozila za prijevoz opasnih materija, izdavanju i izgledu certifikata o ispravnosti vozila za prijevoz određenih opasnih materija, kao i uvjetima koje ispunjava pravno lice iz člana 42. stav 1. ovog zakona (član 42. stav 5).

4) načinu prijevoza opasnih materija unutrašnjim plovnim putevima, istovaru i utovaru i obavezama učesnika u prijevozu opasnih materija u vanrednim događajima (član 55. stav 4),

5) uvjetima koje ispunjava pravno, odnosno fizičko lice koje obavlja provjeru utovarenog tereta sa opasnim materijama (član 56. stav 1),

6) načinu prijevoza opasnih materija na unutrašnjim plovnim putevima (član 56. stav 3) i

7) tehničkim pravilima o podobnosti brodova za prijevoz opasnih materija na unutrašnjim plovnim putevima (član 56. stav 4).

Evidencija nadležnih organa

Član 67.

Ministarstvo saobraćaja i veza i Ministarstvo će evidencije iz člana 55. ovog zakona uspostaviti u roku od šest mjeseci od dana stupanja na snagu ovog zakona.

Primjena važećih propisa

Član 68.

Do donošenja podzakonskih akata iz člana 66. ovog zakona primjenjivat će se važeći podzakonski akti, ukoliko nisu u suprotnosti sa ovim zakonom.

Prijevod i objava međunarodnih ugovora

Član 69.

Ministarstvo saobraćaja i veza osigurava prijevod međunarodnih ugovora i njihovih aneksa na jednom od službenih jezika u Republici Srpskoj, a radi objave i dostupnosti na svojoj internet stranici.

Prestanak važenja Zakona

Član 70.

Stupanjem na snagu ovog zakona prestaje važiti Zakon o prijevozu opasnih materija ("Službeni glasnik Republike Srpske", br. 1/08 i 117/11).

Stupanje na snagu Zakona

Član 71.

Ovaj zakon stupa na snagu osmog dana od dana objave u "Službenom glasniku Republike Srpske".

Broj: 02/1-021-129/16
11. februara 2016. godine
Banja Luka

Predsjednik
Narodne skupštine,
Nedeljko Čubrilović, s.r.

309

Na osnovu Amandmana XL. tačka 2. na Ustav Republike Srpske ("Službeni glasnik Republike Srpske", broj 28/94), donosi m

U K A Z

O PROGLAŠENJU ZAKONA O IZMJENAMA ZAKONA O BUDŽETSKOM SISTEMU REPUBLIKE SRPSKE

Prolašavam Zakon o izmjenama Zakona o budžetskom sistemu Republike Srpske, koji je Narodna skupština Republike Srpske usvojila na Devetoj sjednici, održanoj 11. februara 2016. godine, a Vijeće naroda 22. februara 2016. godine konstatiralo da usvojenim Zakonom o izmjenama Zakona o budžetskom sistemu Republike Srpske nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-588/16
24. februara 2016. godine
Banja Luka

Predsjednik
Republike,
Milorad Dodik, s.r.

Z A K O N

O IZMJENAMA ZAKONA O BUDŽETSKOM SISTEMU REPUBLIKE SRPSKE

Član 1.

U Zakonu o budžetskom sistemu Republike Srpske ("Službeni glasnik Republike Srpske", br. 121/12, 52/14 i 103/15) u članu 8. tačka g) mijenja se i glasi:

"g) porezi na upotrebu, držanje i nošenje dobara:

- 1) porez na upotrebu motornih vozila,
- 2) porez na upotrebu čamaca, plovećih postrojenja i jahti,
- 3) porez na upotrebu zrakoplova i letjelica,
- 4) porez na držanje i nošenje oružja;".

Član 2.

U članu 9. t. z) i i) brišu se.

Član 3.

Ovaj zakon stupa na snagu osmog dana od dana objave u "Službenom glasniku Republike Srpske".

Broj: 02/1-021-126/16
11. februara 2016. godine
Banja Luka

Predsjednik
Narodne skupštine,
Nedeljko Čubrilović, s.r.

310

Na osnovu Amandmana XL. tačka 2. na Ustav Republike Srpske ("Službeni glasnik Republike Srpske", broj 28/94), donosi m

U K A Z

O PROGLAŠENJU ZAKONA O IZMJENAMA ZAKONA O NAKNADAMA ZA KORIŠTENJE PRIRODNIH RESURSA U SVRHU PROIZVODNJE ELEKTRIČNE ENERGIJE

Prolašavam Zakona o izmjenama Zakona o naknadama za korištenje prirodnih resursa u svrhu proizvodnje električne energije, koji je Narodna skupština Republike Srpske usvojila na Devetoj sjednici, održanoj 11. februara 2016. godine, a Vijeće naroda 22. februara 2016. godine konstatiralo da usvojenim Zakonom o izmjenama Zakona o naknadama za korištenje prirodnih resursa u svrhu proizvodnje električne energije nije ugrožen vitalni nacionalni interes ni jednog konstituirajućeg naroda u Republici Srpskoj.

Broj: 01-020-587/16
24. februara 2016. godine
Banja Luka

Predsjednik
Republike,
Milorad Dodik, s.r.

